

*AMURI*

## SAN VALINTINU

Quattordici frivaru!  
'U me' pinsèri  
vola luntanu,  
cerni li riordi.

.....

Avia vint'anni  
e mi faccia 'nfuddiri!  
Era nicuzza,  
meli e tutta spezzi!

.....

Doppu tant'anni  
( 'u tempu scurri e fui),  
lu cori meu  
grapiu la cascitedda.

## RESTA CU MIA

Senza di tia?!  
E chi campassi a fari?!

.....  
Resta cu mia  
e parlami d'amuri.

.....  
Iu ti darrò  
vasuna e 'i me' pinsèri;  
cantami, amuri,  
tutti 'i to' canzuni.

## DISIDDERIU DI CHIANTU

Nun ti nn'adduni  
quannu c'hai ricchizzzi!  
Ma...  
quannu chi si' scarsu...  
.....  
Haiu  
disidderiu di chiantu  
stamatina!

## CINNIRI

Comu  
ti sentu luntana  
ora  
chi lu tempu faju,  
chi li capiddi su' janchi,  
chi surca  
'ncrispanu la me' frunti  
e m'affucanu lu cori!  
Luntana  
comu lu celu!  
Cinniri!  
E marmu  
pi caluri.

## 'NA VARDATA

Du' occhi  
chi taliai  
e mi taliaru  
p'un mumentu;  
'na vardata  
a tipu faru  
chi cerca nta lu scuru.

.....

E ghivi arrèri di tant'anni:  
a' picciuttanza,  
a li capiddi niuri,  
a 'n amuri picciriddu,  
a 'na staciuni  
chi mancu 'u tempu...  
e chi finiu.

## LASSAMI SUNNARI

Cu lu pinsèri  
ti purtai luntanu,  
nt'on locu  
cantuniatu e sularinu:  
'N terra ciuriddi,  
voli d'acidduzzi...

.....  
Quanti vasuna!  
Quanti carizzeddi!

.....  
E ti cantava  
tutti 'i me' canzuni,  
cu lu pinsèri.  
Lassami sunnari.

## FERMATI, LUNA

Fermati, luna, stasira!  
Fammi vardari 'i so' occhi,  
'a so' vucca;  
carizzari, ancora,  
'i capiddi.  
Fermati, luna, stasira!...

.....

E tu, nuvula,  
nun l'accuppunari.